

匈奴聞發兵擊之於是樓蘭遣一子質匈奴一子質漢

後貳師軍擊大宛匈奴欲遮之貳師兵盛不敢當即遣

騎因樓蘭候漢使後過者欲絕勿通時漢軍正在文將

兵屯玉門關為貳師後距師古曰後距者居後以距敵捕得生口知

狀以聞上詔文便道引兵捕樓蘭王將詣闕簿責王師古

曰以文簿一一責之簿音步戶反對曰小國在大國間不兩屬無以自

安願徙國入居漢地上直其言遣歸國師古曰以其言為直亦因

使候何匈奴匈奴自是不甚親信樓蘭征和元年樓蘭

王死國人來請質子在漢者欲立之質子常坐漢法下

蠶室宮刑故不遣報曰侍子天子愛之不能遣其更立